

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tũpa Rahir, recocuer resendar amombehu potami pẽu. ² Yipindar Tũpa aipo ehi imombehu oñehe mombehusar Isaías rembicuachia pipe aracahe:

“Amondora che ñehe mombehusar nde renonera, ndeu peri moatiro água” ehi.

³ “Oyeendu ñehesa ipĩrata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Êgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tũpa upe, ahese opoãpiramora Tũpa pẽu ñero água pe angaipa rese” ehi ava upe. ⁵ Opacatu ava oyugüeru ñehe rendu água ivi Judea rupindar, iyavei tecua Jerusalén pendar oangaipagüer mombehu água. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihi evocoiyase tucru, eiri caha pipendar avei. ⁷ Ahe aipo ehi oñehe ava upe oico: “Che raquicuei oura seco pĩrata catu vahe che sui, sese cheu ndiyai chira ayeaivi ipitaquisã yora água. ⁸ Che supi eté opoãpiramo i pipe tẽi; ahe rumo pe ãpiramora Espĩritu Santo pipe” ehi.

Jesús ãpiramo agüer

⁹ Ipare Jesús osẽ tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osẽ ramoseve i sui, Jesús osepia iva oyemboi tupri, ahese Espíritu ogüeyi iharive apıcasu nungar. ¹¹ Ahese oyeendu ñehesa iva sui aipo ehi: “Nde che Rahır ereico, che rembiaısu, aviha etepri nde rese” ehi vahe.

Jesús recoãhasa

¹² Ipare voi, Espíritu Santo viroguata Jesús ava porẽhisa rupi. ¹³ Aheve Jesús seci cuarenta ari mbahe mimba vai pãhuve. Aheve avei Caruguar osecoãha; Tũpa rembiguai iva pendareta rumo ihañecoño yuvıreco sese.

Jesús omboıpi oporavıqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tũpa mborerecuasa yandeu. Sese, pemboasi pe angaipa, peyevi Tũpa upe, iyavei peroya co ñehesa aviye vahe Tũpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepi ari Jesús oguata ipa Galilea ivi. Ahese osepia Simón, tivri Andrés avei, ahe pira omboha yuvıreco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

¹⁸ Aipo he ramoseve voi, opoi opira mbohasa sui yuvıreco, yuvıraso supı.

¹⁹ Ipare ch̄ihi oguata irimise, ahese osepia Santiago, Zebedeo rah̄ir, tivri Juan reseve carite pipe omoingatu opira mbohasa yuvinoi vu p̄iri. ²⁰ Ahe chupe avei: “Perio che rupi” ehi, evocoyase vu oseya carite pipe ip̄it̄ivisar reseve, yuviraso sup̄i.

Mbia caruguar v̄ireco vahe oyese

²¹ Oyepotase tecua Capernaum ve yuvireco mbituhusa ari pipe, Jesús oi que oporombohe t̄uparove. ²² Evocoyase ava osenduse iporombohesa, “¿Mara ehi rutei?” ehi t̄ei yuvireco chupe. Esapia, ahe oporombohe güeco p̄iratasa pipe, ndahei Moisés porocuita rese oporombohe vahe nungar. ²³ Aheve mbia ahe tecua pendar v̄ireco vahe caruguar oyese, oñehe p̄irata chupe aipo ehi:

²⁴ —¿Mahera vo ereyuño t̄ei cohava oreu, Jesús Nazaret pendar? ¿Ereyu vo ore mocañi ãgua t̄ei? Che orocua ité, nde T̄upa suindar ndaseco marai vahe ereico —ehi chupe.

²⁵ Oñehe p̄irata rumo caruguar upe aipo ehi: — ¡Quiriri, es̄e co mbia sui! —ehi chupe.

²⁶ Evocoyase caruguar mbia rese seci vahe omoehoha seiti iv̄ive, s̄ase, os̄e oso ichui.

²⁷ Opacatu ava ombosiquiye, ichui oporandurandu oyeupe yuvireco aipo ehi:

—¿Mbahe p̄iha co? ¡Iporombohesa ipiasu vahe ité! ¡Co mbia v̄ireco ité omborerecuasa! ¡Caruguar avei eté omboyeroya oyeupe iñehese! —ehi t̄ei ava yuvireco.

²⁸ C̄uriteimi voi yandusa ser̄acua opacatu iv̄i Galilea rupi.

Jesús ombogüera Pedro rembireco si

²⁹ Jesús yuvinosese tũparo sui, yuviraso Santiago, Juan rese Simón, Andrés rêtave. ³⁰ Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco. ³¹ Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pĩtu ramose opacatu imbaheasi vahe iyavei caruguar vireco vahe viraso yuvireco chupe imbogüera ãgua. ³³ Opacatu ava ahe tecua pendar oñemonuha oquendipive yuvireco. ³⁴ Evocoyase setá ombogüera mbaherasi-rasi tẽi vireco vahe, iyavei omboyepepi setá caruguar ava sui. Ndoipotai rumo caruguar ñehe. Esepia, ahe oicua ité evocoyase seco yuvireco.

Jesús Vu Tũpa Ñehengagüer omombehu judío tũparo rupi

³⁵ Ayihiteve Jesús oñarapuha oso ava porẽhisave oyerogui ãgua. ³⁶ Evocoyase Simón ondugüer reseve yuviraso seca. ³⁷ Osepiase,

—Opacatu ava nde reca tẽi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tũpa Ñehengagüer mombehu ãgua aheve; evocoi nungar apo ãgua niha che ayu —ehi.

³⁹ Ëgüe ehi uguata opacatu Galilea ivi rupi, omombehu Vu Tũpa Ñehengagüer judío tũparo yacatu rupi oico, iyavei setá omose caruguar ava sui.

Jesús ombogüera mbia lepra vireco vahe

⁴⁰ Ñepeí mbíá lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūrítei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa re-sendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbíá rumo oso omombehu-mbehu opacatú ava upe. Sese Jesús ndoicatu iri güeique ãgua güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepeí arí pipe Jesús oyeví ou tecua Capernaum ve, ahese opacatu oyandu ñepeí oive secoise yuvireco. ² Cūríteimi voi eté setá ava oñemonuha yuvireco secosave. Sese ndipoi eté ava reique iri ãgua oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbíá viroyepota ndoguatai vahe yuvireco chupe. ⁴ Ahe rumo ndiyai seroique ãgua Jesús uve ava rehísave yuvireco. Sese viroyeupi oi haríve seraso yuvireco. Aheve teca virocua oi sui yuvireco; supí viroyí supa reseve imondo Jesús

rovai tupri yuvireco. ⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu — ehi.

⁶ Moisés porocuita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpañi ité niha oicatu ava angaipa upe oñeroi ãgua” ehi. ⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave — ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondi yuvireco, omboetei Tūpa yuvireco aipo ehi:

—Yipisuiwe ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivi. Aheve oporombohe oyese ava rehii yemboyase. ¹⁴ Ichui oguata vitesse, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opũha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuasar iyavei ava yangaipa vahe pãhuve. Esepia, setá ava osaquicue moñaño ité yuvireco. ¹⁶ Evocoyase Jesús ocaruse ipãhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pãhuve tẽi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepi ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase omboyevi ahe ava upe:

—¡Ndiyai eté ichohopri mendasave iyecuacu ãgua imer oicove vıtese ipãhuve! ²⁰ Oimera rumo ari imer reraso ãgua ichui curi, ahese ramo oyecuacura yuvireco cute —ehi.

21 “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité. 22 Iyavei uva ricuer ipiasu vahe ndiyai iñasa mbahe pিরer cuacua pipe. Esepia, uva ricuer ipiasu vahe ose mbahe pিরer cuacua vahe pipe, ombopuñora, uva ricuer evocoyase ocañipa tẽira, iyavei mbahe pিরer ocañi tẽi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

23 Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipohopoho sãhi yuvireco. 24 Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

25 Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. 26 Pahi rerecuar ivate catu vahe Abiatar serer vahe recose, ahese David oique Tũpa rẽta pipe pan imboeteipri Tũpa upendar reca ondugüer reseve yuvirohu ãgua. Ahe chupe acoi ndipotasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

27 Iyavei aipo ehi:

—Mbituhusa ari yaposa ava upe nara, ndahei
ava yaposa mbituhusa ari upe nara. ²⁸ Sese Ava
Riquehir mbituhusa ari rereciar secoi —ehi Jesús
fariseo upe.

3

Mbia ipo nomii vahe Jesús ombogüera

¹ Jesús oique iri judío tūparove. Aheve oime mbia
ipo co cotigüer nomii vahe. ² Aheve avei fariseo
‘¿ombogüerara pīha mbituhusa ari pipe?’ oya om-
ahengatu yuvireco sese ‘yaiñhengapo angahu’ oy-
apave tēi. ³ Evocoyase Jesús aipo ehi co mbia ipo
nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi:
mbahe avīye vahe pīha, mbahe naporai vahe tie?
¿Yaipīsiro pīha ava recocuer, yamocañi uca tēi tie?
—ehi chupe.

Ahe rumo opaño iquiriri tupri yuvireco.

⁵ Evocoyase omahe ava oyese oyere tupri
vahe rese vorīēhisave iyavei ndovihai ava
ndosenducua catuise yuvireco. Sese aipo ehi
ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité.

⁶ Ahese fariseo opa yuvinose yuviraso oyemoin-
gatu Herodes rupindar rese Jesús yuca āgua
yuvireco.

Ava rehi ipa popi rupi yuvirecoi

⁷ Ipare Jesús yuviraso güemimbohe reseve ipa
popi rupi, ava rehi avei ivi Galilea rupindar

yuvirasu supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia água. ⁹ Sese oyocuai güemimbohe vireco voi vaherã ñepei carite yuvireco ava omboti etepriëhi água yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuvirasu chupe sese opoco água.

¹¹ Iyavei ava caruguar vireco vahe sepiase, oñenopiha sovai, oñehe pucu-pucu yuvireco:

—¡Nde Tũpa Rahir ereico! —ehi.

¹² Jesús rumo oñehe pĩrata chupe: “Che mombe-hui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo água güemimbotar rupi. Ichui oyugüeru yuvireco chupe. ¹⁴ Ahe ipãhu pendar osenoi doce tupri güemimboherã ‘toguataño che rupi, tomombehu Tũpa Ñehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa caruguar ava sui imboyepepi água yuvireco’ oyapave. ¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatëhi vahe pãhu pendarer; ¹⁹ iyavei Judas Iscariote, ahe omondo vaherã Jesús yamotarëhisar upe.

“Jesús carugar pĩratasa viireco oyese” ehi tẽi ava yuviireco

²⁰ Ipape Jesús oi que oi pipe güemimbohe reseve. Aheve oñemonuha ati irise ava yuviireco sese, ndiyai icaru ãgua yuviireco. ²¹ Oyanduse imu secocuer yuviireco, oyugüeru seraso ãgua ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Combia carugar rerecuar Beelzebú oyocuai vahe, ipĩratasa pipe tẽi omboyepepi carugar ava sui” ehi yuviireco.

²³ Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pĩratasa ocañi tẽira. ²⁵ Acoi oñemu oyese ae oyeamotarẽhise, oyemboyahose yuviireco viña, ahe ndipocopi chiaveira yuviireco. ²⁶ Acoi carugar oyemboyahose ovava ãgua oyeupe ae yuviireco, ndipocopi chiaveira yuviireco, ahe evocoyase secocuer ocañi tẽi va-herã ité yuviireco.

²⁷ “Ndipoi eté niha ava oi que vahe que ava ipĩrata etepri vahe rẽta pipe imbahe rerocuapa ãgua ichui; oñapichi rane itera. Ipape voi opara imbahe virocuacha ichui.

²⁸ “Supi eté aipo ahe pẽu: Acoi ava yangaipa vahe upe Tũpa iñerora opacatu yangaipa rese, iñehe-ñehe tẽisa rese avei. ²⁹ Acoi iñehe-ñehe tẽi vahe rumo Espĩritu Santo rese, ahe chupe ndipo iri chietera ñerosa apirẽhi va-herã ité” ehi.

³⁰ Aipo ehi Jesús imboyeví ava upe. Esepia, “Carugar tēi erereco” ehiño ava yuvireco chupe.

Jesús sí, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē ãgua. ³² Yivii yuvinoi vahe oñehe yuvireco chupe:

—Nde sí, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pñha che sí; ava pñha che rivireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che sí eta; co che rivireta. ³⁵ Esepia, acoi Tũpa remimbotar oyapo vahe yuvireco, ahe che rivri, che reindri, che sí avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehií oyemboya yuvireco sese. Ipare oha carite imbehive tui vahe pipe. Aheve oguapí oĩ oñehe. Ava rumo opacatu ivi ãtasa rupi opitaño yuvireco.

² Evocoyase ava mbohe ãgua omboyoya tecocuer mbahe tisa rese aipo ehi:

³ “Pesendu co ñehesa: Ñepeí mbia osē omaheti.

⁴ Ahe otíapi-apíise mbahe rãhií oso, moviro oviapi perí rupi. Vĩrai yugüeruse rumo, opaño yuvirohu.

⁵ Iyavei moviro oiti ivi nayanai vahesave, ita pãhuve. Sese cūríteimi sori. ⁶ Ari tasise rumo, opaño ipiru. Esepia, ndasapoi niha. ⁷ Iyavei

ambuae mbahe rãhi oiti yu pãhuve; ahe yu rumo sori poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rãhi oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove senta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pãha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pëu niha Tũpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepiã tẽira, ndosepiacuai chietera rumo yuvireco. Iyavei yepe osendu tẽira, ahe rumo ndosenducuai chietera yuvireco, Tũpa upe oyevi potaẽhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tãsa resendar

¹³ Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri ãgua? ¹⁴ Evocoi mbahe rãhi oñoti vahe, Tũpa Ñehengagüer mombehungar. ¹⁵ Amove ava recocuer inungar co mbahe rãhi seitipri peri rupi: osendu angahu Tũpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui.

16 Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesá pipe; 17 ndovirecoi rumo guapo oyese opĩrata āgua. Evocoiyase yuvirecoise mbahe-mbahe tēi pipe Tūpa Ñehengagüer sui tēi, cūriteimi seroyaēhisave, ‘Apoira ichui’ ehi yuvireco. 18 Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, 19 ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypo ucai avei mbahe eta aviye vahe evocoi nungar ava upe. 20 Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

21 Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape āgua. 22 Ndipoi chietera mbahe ñomipri ndayasepiaí va-herā curi. 23 Acoi osendu pota vahe che ñehe, toyapisacaño yuvireco sese” ehi.

24 Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu. 25 Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

Yembohesa mbahe rāhii rorisa resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii. ²⁷ Omaheti pare, oso oque. Ipare coiye catu oñarapuha. Ahe oñocua pĩtu, ari avei, evocoyase mbahe rāhii sori poyava yuvireco. Itĩsar rumo ndoicuai mara ehi vori. ²⁸ Ivi rese niha oyesu miti: yipindar sori, ipare iha, ipare sāhii yuvinose sese. ²⁹ Evocoyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pẽu; mbahe rese pĩha iyacatu imboyoyasa icua āgua? ³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. ³² Ñoti pare rumo, sori, ocuacuase tuvichá catu ambuae mbahe miti sui. Sāca tuvichá ité, sese vĩrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepei mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaẽhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pĩtu ramomise, aipo ehi güemimbohe upe:

—Yaso ipa rovai—ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi. ³⁷ Oyepotase rumo ivitu ai ipirata vahe, i ohitu vahe oha guasu-guasú carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pĩrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pĩha co mbia secoi? Esepia niha, ivitu ai, ipa avei omboyeroya —ehi tẽi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe. ³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tẽi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pĩtu rupi oguata, osapucaí oico

ivĩtri mahugüer rupi, tuvĩpa mahugüer rupi avei; oca-oca ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pĩrata chupe:

—¡Eyepipi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisũhi ãgua eve! —ehi.

⁸ Aipo ehi, esepia, yipĩndar Jesús aipo ehi chupe:

—¡Carugar mbahe tẽi vahe, esẽ co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legi3n. Esepia, ore rehi etẽ —ehi.

¹⁰ Oporandũ chupe omondopaẽhi ãgua co ivi sui. ¹¹ Ichui namombriimi setá cuchi ocaru vahe ivĩtri rese yuvireco. ¹² Sese carugar oporandu yuvireco chupe:

—Ore mondopaño cuchi avĩterve eve —ehi yuvireco.

¹³ Evocoyase Jesús omondo carugar sẽ ãgua ahe mbia sui. Ahe opa yuviroique cuchi avĩterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pĩha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Aheve oyembosiquiye tẽi yuvireco. ¹⁶ Mbahe oime vahe carugar vireco vahe rese, cuchi rese avei, ahe

sepiasar omombehupa ambuae ava upe yuvireco. ¹⁷ Evocoyase ava Jesús upe: “Esẽ cohave sui” ehi yuvireco.

¹⁸ Oha irise Jesús carite pipe, co mbia caruguar rerecosarer oporandu chupe supi oso ãgua. ¹⁹ Ahe rumo,

—Esoño nde rêtave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tẽi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. ²² Evocoyase oyepota mbia mborerecuar tũparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tẽi nde po iharive imbogüera ãgua —ehi.

²⁴ Evocoyase oso supi. Ava rehii avei yuviraso supi. ²⁵ Ipãhuve avei oime cuña doce araviter rupi suvi yepiyere-yere vahe. ²⁶ Iparaísú iteanga, setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri tẽi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, oguata saquicuei oso ava

rehî pãhuve, iturucuar rese opoco. ²⁸ Aipo ehi oyeupe oico: “Iturucuar rese apocose rumo, acuerara” ehi. ²⁹ Ahe ramoseve voi ndasuvî yepiyere iri. Ipare oyandu gütetecuer yemoingatu tupri, ocuerase ombaherasisa sui. ³⁰ Jesús rumo oyandu osêse opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevî yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oivĩndar rese ‘¿uma ité pĩha opoco che turucuar rese?’ oya.

³³ Evocoyase co cuña oicuse mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe.

³⁴ Evocoyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñhe vitesese, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho ãgua; Pedro, Santiago, Juan güeraño oipota.

³⁸ Oyepotase Jairo rētave, osepia ava yemondi oyaseho vahe. ³⁹ Ichui oiquese oi pipe, aipo ehi:

—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.

40 Ava rumo opucaete-eteño seroyaëhisave yuvireco. Evocoyase omose opacatu ava. Ipare omoingue iyésupa, ichi, oyeupindar reseve cuñatai rehögüersave. 41 Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

42 Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco. 43 Jesús rumo oyocuai imombehuëhi ãgua ambuae ava upe. Ipare,

—Pembocarú co cuñatai —ehi.

6

Jesús Nazaret ve secoi

1 Jesús osë co tecua sui oso güecuave; semimbohe avei yuviraso supi. 2 Oyepotase mbituhusa ari, ahese oporombohe tũparo pipe. Setá ava ñehe rendusar oyepihamondisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pñha vinose co mbahecuasa co poromondisa apo ãgua? —ehi yuvireco oyeupe —. 3 Co niha carpintero, María membri; Santiago, José, Judas iyavei Simón riquehir, seindri avei yuvirecove yande pãhuve —ehi.

Sese ndoviroyai yuvireco. 4 Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sëta pipendar ae rumo nombotei yuvireco —ehi.

5 Ndoicatu mbahe oporomondi vahe apo ãgua ava viroyaëhisa pipe, sese moviro tēi

imbaheasi vahe harive omondo opo imbogüera ãgua. ⁶ Ndoyembovihai ava viroyaẽhisa rese.

Jesús oyocuai güemimbohe Tũpa mborerecuasa mombehu ãgua

Ipare Jesús oso, oguata tecua-tecuami namombrĩi vahe rupi oporombohe oico.

⁷ Evocoiyase, “Perio” ehi güemimbohe doce vahe upe. Ipare oyocuai ñuvirio-río, iyavei omondo güeco pĩratasa carugar mboyepepi ãgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei. ⁹ Iyavei pemondera pĩtaqui güeraño. Ndape-mondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesẽra pecua. ¹¹ Acoi ambuae tecua pendar ndape piši potaise, ndosendu potaise avei pe ñehe yuvireco, peyepipiñora ichui. Peipipeteño aveira pe piivi rãtachigüer sui. Ëgüe pe hesa omboyecuar cañisa apirẽhi yuvireco chupe —ehi.

¹² Evocoiyase semimbohe eta yuviraso, “Pemboasi pe angaipa, peyevi Tũpa upe” ohe ãgua yuvireco. ¹³ Iyavei setá omboyepepi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipĩrata vahe —ehi.

¹⁵ Ambuae rumo,

—Tūpa ñehe mombehusar Elías mo evocoi —ehi yuvireco.

Ambuae evocoiyase,

—Tūpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūritei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoiyase oyuca pota Juan yamotarēhisave; ndoicatui rumo yuca. ²⁰ Esepia, Herodes osiquiyeño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membri cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoiyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osẽ oso, osi upe oporandu:

—¿Mbahe rese pĩha aporandura chupe? —ehi.

Ichĩ aipo ehi chupe:

—Eporandu Juan Oporoãpiramo vahe ãca rese — ehi chupe.

²⁵ Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

²⁶ Mborerecuar rumo ndoyembovĩhai tẽi. Es-epia, ava ichohopri rovaque ité yipĩndar oñehe. Sese ndoicatui, “Aní” ohe ãgua. ²⁷ Evocoyase ipare voi mborerecuar oyocuai sundao Juan ãca reru ãgua. ²⁸ Sundao oso soquendasave, oyasia Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuvĩraso setecuer reca. Ipare vĩraso yuvĩreco tuvĩpave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús pĩri yuvĩreco. Ipare omombehu mbahe güembiapogüer, oporombohe agüer avei yuvĩreco chupe. ³¹ Ahese aipo ehi oapóstol upe:

—Perio cohave, yaso, yapituhumi rane co coti — ehi.

Esepia, oyepĩndecuaño ité ava yugüeru chupe, sese ndiyai icaru ãgua yuvĩreco. ³² Evocoyase ahe güeraño apóstol reseve yuvĩraso carite pipe co coti ava sui. ³³ Setá rumo ava osepia ichose.

Ichui opacatu ava tecua rupindar osaquicue moñaño; ahe ranengatu oyepotapa yuvireco ichui.

³⁴ Ogüeyise rumo carite pipe sui, osepia ava rehi, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru ãgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pïha oreu dosciento denario pan repirã ava mbocarü ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapi capihi hari rupi. ⁴⁰ Cincuenta, cien rupi-rupi oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe ìva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo ãgua yuvireco. Pira ñuvirío vahe avei omboyaho-yaho opacatu ava upe. ⁴² Evocoyase opacatu ava ocaru vahe ihitaropa tõi yuvireco. ⁴³ Ipare semimbohe omboapipopa doce tupri iruova pan

iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i harí rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese ozeroqui ägua. ⁴⁷ Pıtuse carite ipa mbıterve ité secı. Jesús rumo ahe ae opıtaño ivıve. ⁴⁸ Ahese om-ahe güemimbohe rese iyeapıcuı catuēhıse. Esepia, ivıtu ipırata vahe osovaıchi yuvireco. Cōhe potase, oguata i harı rupi güemimbohe cotı oso. Aviye ité acıı oñocuaño vaherã oso. ⁴⁹ Sepıase rumo ‘hãgüer tēi revo’ oya, sãse pucu-pucu i harı rupi iguatase semimbohe yuvireco. ⁵⁰ Esepia, opacatu osepiase osıquıye yuvireco ichui. Ahe rumo aıpo ehi:

—ıPeyemovıracuaño, che tēi! ıPesıquıye eme che sui! —ehı güemimbohe upe.

⁵¹ Ahe ohası carite pipe, opıtuhu voi ivıtu. Evocıyase, “ıMara ehi ruteı!” ehi tēi yuvireco. ⁵² Esepia, ndoıcuı vıteı eté pan apo atı agüer yuvireco, yavai vıte seroya ägua yuvireco chupe.

Jesús ombogüera ava imbaheası vahe Genesaret pendar

⁵³ Osasase ipa, oyepota Genesaret ivı rese yuvıraso, ahe imbehıve oñapıchiño carite yuvireco. ⁵⁴ Yuvınosepa ramıseve, ava oıcuı voi Jesús yuvireco. ⁵⁵ Ichui opacatu ahe ivı pıpendar güeru imbaheası vahe Jesús upe yuvireco. ⁵⁶ Oyepotase que tecuamıve, anıse tecua guasuve, caha pipe oı-oımi rupi, ahe supı

imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ãgua iye-poiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracadendar recocuer sui ndipoisai eté yuvireco, sese oyepoiēhise ndocarui eté yuvireco yepi. ⁴ Mbahe rerocuasa sui oyevisē, ndocarui oyepoiēhi viteseve yuvireco. Iyavei tecocuer aracadendar tēi oyapo vite yuvireco in-ungar igua riru piisa, mbahe riru guarepochi apopri iyavei vupa moatiro tupriisa.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramo aracadendar recocuer ndoviroya iri yuvireco? Esepia ru, ahe ocaruño opo quihā reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía aracadendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi' ehi.

⁸ Ēgüe peye pepoipa Tūpa porocuita sui ava recocuer aracahendar rupi tēi pe guata āgua —ehi.

⁹ Iyavei aipo ehi iri chupe:

—Pe ramoi recocuer aracahendar pīpe tēi pe-seyaño co coti Tūpa porocuita. ¹⁰ Esepia, Moisés aipo ehi: ‘Pemboyeroyara iyavei peipītivira pe ru, pe si avei no. Acoi iñhe mara vahe oyesupa upe ahe, Tomanño, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye; ¹² pe evocoyase, aipo ehi vahe upe, ‘Ndiyai eté oyesupa pītivii āgua’ peye. ¹³ Co nungar apo pīpe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehii upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oi que oi pīpe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oi que vahe ava aviterve nomboangapai eté? ¹⁹ Esepia niha, ndahei ipihave oso, ahe rumo oso yaviterve.

Ipare osẽ ichui —ehi ‘opacatu tembihu aviyẽño ité’ oyapave aipo ehi.

²⁰ Ipare aipo ehi:

—Ava p̄iha sui osẽ vahe rumo mbahe, ahe omonguiha ava recocuer. ²¹ Esepia, ava p̄ihañemoñetasa sui osẽ p̄ihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tẽi pota raisa, mbahe rese ñemoirosa, ava rese ñemoñeta tẽisa, teco ivate aisa, p̄ihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca ãgua —ehi.

Cuña ndahei vahe judía viroya Jesús

²⁴ Ichui Jesús osẽ oso tecua Tiro coti. Aheve oi que oi p̄ipe, ndoyecua uca potai ava upe viña; ndoicatu rumo ava sui oñemi. ²⁵ Oime cuña vireco vahe omembri cuñatai, ahe vireco carugar oyese; ahe cuña oicuse Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo ãgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Caruguar osẽ nde membri sui —ehi chupe.

³⁰ Co cuña oyepotase güetave, osepia omembri supave; yipive rumo osẽ caruguar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tẽi nde po iharive” ehi yuvireco chupe.

³³ Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese. ³⁴ Ipare omahe iva rese, ipituhe pucu aipo ehi: “¡Efata!” ehi (“timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei.

³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoyase ava oyembovaha gausave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepeí arí pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi arí yuvirecoi yande piri, iyavei ndipoi eté mbahe semihura. ³ Amondopase sètave

sieporēhi reseve, viroviapi-api tiētera tieporēhi perī rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohave ava porēhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tūpa upe. Ichui omboyaho-yaho pan imondo güemimbohe upe, semimbohe evocoyase omondo ava rehii upe yuvireco. ⁷ Iyavei vireco moviro pirami yuvireco, sese avei, “Aviye ndeu” ehi iri Tūpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. ¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi ãgua yuvireco. Jesús recoãha ãgua, oporandu iva pendar poromondiisa rese ‘¿Tūpa sui eté pīha ou?’ oya yuvireco chupe. ¹² Sese Jesús ipĩtuhe pucu, aipo ehi:

—¡Mahera vo co ava oipota iva pendar poromondiisa che recocuer cua ãgua yuvireco! Namboyecuai chietera rumo que ñepeí evocoi nungar mbahe pëu —ehi.

¹³ Ipare oseyapaño ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tëi pan viraso güemihura yuvireco.

¹⁵ Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruise revo aipo ehi yandeu” ehi-ehi tëi oyeupe yuvireco.

¹⁷ Ahe rumo oicua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya ãgua pëu? ¹⁸ Oime tëi pe resa, ndapesepiai rumo; oime tëi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyahoyahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyahoyahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapısoi vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapısoi vahe yuvıreco chupe ‘epocomi tēi sese’ oya yuvıreco. ²³ Evocoiyase oıpopısi ndasesapısoi vahe seraso co cotımi tecua sui. Aheve omondo güendi sesa rese, omondo avei opo iharıve. İpare oporandu chupe: “¿Eresepia vo mbahe?” ehi. ²⁴ Ndasesapısoi vahe omahese, aipo ehi:

—Asepia ava inungar ivıra oguata vahe yuvıreco —ehi.

²⁵ Evocoiyase omondo iri opo sesa rese. İpare co mbıa omahe tuprı ité cute, ocuera ité, opacatu mbahe osepia tuprı. ²⁶ Ichui Jesús omondo sētave aipo ehi chupe:

—Ereyevı iri eme tecuave —ehi.

Pedro oicua uca Jesús Tūpa Rembıporavo seco rese

²⁷ İpare yuvıraso Jesús güemimbohe reseve ivı Galilea sui tecua Cesarea cotı, Filipo ivı rese. Perı rupı oporandu güemimbohe upe:

—¿Mara ehi vo ava oñehe yuvıreco che rese? —ehi.

²⁸ Semimbohe evocoiyase omboyevı yuvıreco chupe:

—Amove ava, “Juan Oporoãpiramo vahe” ehi yuvıreco ndeu; ambuae evocoiyase, “Elías” ehi; ambuae, “Tūpa ñehe mombehusar mboetasa” ehi yuvıreco ndeu —ehi.

²⁹ Evocoiyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tūpa Rembiporavo Poropĩsirosar ereico —ehi.

³⁰Jesús rumo, “Pemombehui rene que ñepei ava upe” ehi.

Jesús omombehu omano āgua

³¹Evocoyase Jesús omboĩpi oporombohe: “Che, Ava Riquehĩr, che paraĩsu itera, iyavei opacatu judío rerecuareta, pahĩ rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi. ³²Ahe omboyecua tupri ité chupe. Evocoyase Pedro viraso co cotimi chupe oñhengata āgua. ³³Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

³⁴Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungarra curusu rese ovosira viña, toyemoingatu voi che recocuer rese oparaĩsu āgua iyavei toguata tupri che rupi. ³⁵Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisirora. ³⁶¿Aviye ai angahu piha ava upe opacatu mbahe ivi pipendar pisi āgua tēi, ahe ae tēi omocañi güecocuer yuvireco viña? ³⁷¿Mbovi piha omondora ava güecocuer repirã viña?

³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehir, ãgüe ahera acoi ayevisé che Ru reco pĩrata porañetesa pĩpe, sembiguai rehii iva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vıteı chivaherã, osepia rane itera ouse Tũpa mborerecuasa ipĩratasa pĩpe yuvireco curi —ehi.

Jesús ñecuñaro agüer

² Seis ari pare, Jesús viraso Pedro, Santiago, Juan reseve ivıtri ivate vahesave oyeupi. Aheve aviyeteramo tẽi oñecuñaro güemimbohe rovai.

³ Iturucuar sendı, morochı eteanga. Ndipoi eté que ava co nungar co ivı pĩpe turucuar oyosei vahe. ⁴ Iyavei aviyeteramo tẽi oyemboyecua Elías, Moisés reseve Jesús rese oñemoñeta yuvinoha.

⁵ Ipare Pedro aipo ehi chupe:

—Ore mbohesar, javıye ai eté cohava yaico! Toroyapo mbosapı teyupami: ñepei ndeu nara, ambuae Moisés upe, ambuae evocoiyase Elías upe nara —ehi.

⁶ Osıquıye tẽi semimbohe yuvireco. Sese Pedro ndoicuaise oñehe ãgua, aipo ehiño tẽi. ⁷ Ahe ramoseve avei ogüeyı iva quıha iharıve, oyopıpa tupri yuvireco. Ahe ipãhuve oyeendu ñehesa aipo ehi vahe: “Co che Rahı, che rembiaısu; peyapısaca catu iñehe rese” ehi vahe. ⁸ Ahe ramoseve avei

omahese oiv̄i yuv̄ireco, ndosepiai eté que ambuae ava, Jesús güeraño tupri ité osepia opãhuve yuv̄ireco.

⁹ Ipare ogüeyi iv̄itri sui yuv̄ireco, aipo ehi güemimbohe upe ou: “Ndapemombehui chietera que ñepi ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi t̄ei v̄ireco aipo ñehesa yuv̄ireco, ahe rumo oporandu-randu oyeupe: “¿Mara oya p̄iha aipo, ‘Acuerayevira’ ehise?” ehi t̄ei yuv̄ireco. ¹¹ Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuv̄ireco? —ehi yuv̄ireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu água. ¿Mahera aracahendar icuachiapri p̄ipe aipo ehi: “Ava Riquehir oiporarara mbahe, yamotar̄imbri avei secoira” ehi? ¹³ Che niha aipo ahe p̄eu: Elías rumo ou ité, ava evocoyase opacatu güemimbotar t̄ei oyapo yuv̄ireco sese. Ëgüe ehi opacatu yav̄iye aracahendar icuachiap̄irer sese — ehi.

Jesús ombogüera ch̄ihivahe caruguar rerecosar

¹⁴ Ipare oyevi yuv̄ireco güemimbohe recosave. Aheve osepia ava reh̄i oyere guasuse yuv̄ireco sese, iyavei oime aheve Moisés porocuita rese oporombohe vahe oiñehepoepi-epi semimbohe yuv̄ireco. ¹⁵ Ichui Jesús repiase, opacatu yuv̄inoña yuv̄iraso chupe “av̄irave” apo. ¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe?
—ehi.

¹⁷ Ñepeí ipãhu pendar omboyeví chupe:

—Porombohesar, co aru che rahír ndeu, víreco vahe caruguar oyese, nomoñehengatu ucai vahe yepi. ¹⁸ Iyaveí que iguatasa rupi co caruguar aviyeteramo tēi opocose sese, oití voi ivive iyaveí sendiriyuiyusu, sãitere-tere avei; sese cūritei nipi-rata iri eté. “Penosemi caruguar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyeví chupe:

—¡Too, ndapeyeroya tupri vitei eté che rese! ¿Mboví rupi rutei vo aico vítera pe pãhuve che ñemosasa pipe? Peru evocoi chñhivahe cheu —ehi.

²⁰ Evocoiyase ogüeru yuvireco chupe. Osepiase caruguar Jesús, oití uca iri chñhivahe ivive. Omboapayere-yere iyaveí sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichñhivahemi suive ité. ²² Amove co caruguar oití uca tatave, ive avei yuca pota uca ãgua yepi. Sese ereicatuse, ore pñtiviiñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pñtivii ru eve nde reroya catu ãgua! —ehi pñrata chupe.

²⁵ Osepiase Jesús ava rehi, oyemboyase sese, oñhe pñrata caruguar upe aipo ehi:

—Carugar noñehi vahe, ndayapisai vahe, che orocuai, epoi co chñivahe sui, ereique iri eme secocuer rese —ehi.

²⁶ Carugar sãse pucu chñivahe yuca tupri oso. “Omano ité co chñivahe” ehi ambuae ava yuvireco. ²⁷ Jesús rumo oipopisi imopuha; evo-coiyase chñivahe opũha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pĩha ndoromose catui eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarẽhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehi tupri yuvireco chupe. Esepia, peri rupi, “¿Ava pĩha ivate catu vahe?” ehi

asi-asi oyeupe yuvireco. ³⁵ Evocoiyase oguapisave, “Periopa” ehi güemimbohe upe, aipo ehi avei:

—Oimese pe pãhu pendar oyemboivate ai vahe, ahe rumo seco ivi coti catura opacatu sui ava eta pãtivii ãgua —ehi.

³⁶ Ipare oipisi chĩhivahe güemimbohe pãhuve senoha aipo ehi:

³⁷ —Acoi ava oipisi vahe co chĩhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarẽhimbar, ahe yande mboyoyasar secoi

³⁸ Evocoiyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cũritei ore rupi; ore ité ndoroipotai chupe —ehi.

³⁹ Jesús rumo,

—Aní ãgüe peye —ehi—. Esepia, ndipoi eté que ambuae oyapo vahe poromondisa che rer pipe, oicatu vaherã õñehe rai che rese. ⁴⁰ Sese ndayande amotarẽhi vahe, ahe yande mboyoyasar secoi.

⁴¹ Acoi que omondo vahe i vaso pipe che rupi pe recosa pipe pẽu, evocoi nungar oipisi itera porerecosa oyeupe nara —ehi.

Yaicua catura mbahe tẽi apoẽhi ãgua

⁴² “Acoi que ava omboangaipa uca vahe co chĩhivahemi nungar che reroyasar, iyacatu evocoi nungar ñapichisa ita mbahe mbocuhisa iyesiho rese para guasu pipe imombo ãgua. ⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirẽhisave

ñepei pe po rese, peso rãgüer sui que ñuvirío pe po rese tata guasu apirêhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pi pe mboangaipa ucase, peyasía avei peyesui. Esepia, aviye catu ndape pindugüei peique tecovesave, que ñuvirío pe pi rese peique rãgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepei pe resa rese Tüpa mborerecuasave que ñuvirío pe resa rese tata guasu apirêhisave pe reique rãgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe. ⁵⁰ Sese yucrí aviye ai eté. Nasehe irise rumo, ndayaicatui chira imoehe iri ãgua. Peico catu yucrí nungar mbahe tuprí pipe peyeupe nara” ehi.

10

Jesús oporombohe mendasa sui poiêhi ãgua

¹ Ipare Jesús osê tecua Capernaum sui, oso Judea ivi rupi iai Jordán rovai arí sêsa coti. Aheve ava rehíi oñemonuha iri yuvireco sese. Iyavei ombohe iri ava güecocuer rupi tuprí. ² Evocoyase fariseo oyemboya seco rãha ãgua têi yuvireco sese, “¿Aviye pîha cuimbahe omenda vahe opoi güembireco sui?” ehi yuvireco chupe. ³ Ahe rumo omboyeví chupe:

—¿Mara ehi vo acoi Moisés porocuita pipe? — ehi.

⁴ Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi

ãgua pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaẽhisa pipe sui pẽu. ⁶ Yipisuive ité niha, ‘Tũpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepepira oyesupa sui güembireco rese ité yuvirecoi ãgua. ⁸ Evocoyase ñuvirío yuvirecoira ñepeï ava nungar.’ Sese ndahe iri ñuvirío, ñepeï nungar ité yuvirecoira. ⁹ Evocoyase ava Tũpa omomenda vahe oyese, ndiyai ava tẽi omboyepepi yuvireco oyesui —ehi.

¹⁰ Oive yuvirecoi vitesẽ, semimbohe oporandu iri co mbahe rese yuvireco chupe. ¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tẽi vahe güembireco sui. ¹² Acoi cuña opoise omer sui omendase ambuae cuimbahe rese, ahe oyemboaguasa tẽi vahe avei —ehi güemimbohe upe.

Jesús osovasa chĩhivahe

¹³ Ipare ogüeru chĩhivahe Jesús upe yuvireco sese ipoco ãgua. Semimbohe rumo, “¿Mahera vo peruño tẽi chĩhivahe?” ehi opiha vĩracuasa pipe serusar upe yuvireco. ¹⁴ Evocoyase Jesús osepiase, ndasoriĩ güemimbohe upe aipo ehi:

—¡Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru Tũpa mborerecuasave.

15 Supi eté, acoi ndoipisii vahe che Ru Tũpa mborerecuasa chĩhivahe nungar yuvireco, ahe evocoyase ndoyuviroiquei chietera ipipe —ehi.

16 Evocoyase oipisi, omondo opo iharive osovasa.

Ñepi mbia chĩhivahe imbahe eta vahe oñehe Jesús upe

17 Oguata vitesse Jesús yuvireco, aheseve mbia chĩhivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirẽhi vahe rereco ãgua? —ehi.

18 Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepi aviye vahe ité, ahe Tũpa seci.

19 Ereicua niha Tũpa porocuita: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

20 Ahe mbia rumo,

—Porombohesar, che aipo nungar opacatu amboaviye ité che chĩhivahe suive —ehi.

21 Evocoyase omahe saísusave sese, aipo ehi chupe:

—Ñepi mbahe rumo ipane vite ndeu: eso, emondopa rane nde mbahe; ahe seprĩ evocoyase emondo ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

22 Aipo oyeupe hese rumo, ahe mbia oyepepiño ichui oviharẽhisave oso. Esepia, ahe mbahe yar ité seci.

²³ Evocoyase omahe oivindar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tũpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tẽi iñehe renduse yuvireco. Ahe rumo omombehu iri:

—Che rahireta, ¡yavai eté Tũpa mborerecuasave imbahe eta vahe reique ãgua ombahe eta rese tẽi ipihañemoñeta vahe upe! ²⁵ Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasu yuvireco. Oporandu-randu tẽi oyeupe yuvireco: “¿Ava angahu pĩha oñepisirora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tẽi upe rumo yavai aipo nungar mbahe apo ãgua; Tũpa upe rumo ndayavaimi eté. Esepia, Tũpa opacatu mbahe mboavaisarẽhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyevi rumo Pedro upe:

—Supi eté co aipo ahe pẽu: acoi che raisusa pipe iyavei ñehesa ñepisirosa raisusa pipe oseyapa vahe güeta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tẽi viña. Ipare rumo tecua ambuaeve oipisi aveira tecovesa apirẽhi vahe curi. ³¹ Setá vai rumo cũritei yipindar

vahe; ipa tẽira yuvirecoi. Setá aveira cũritei ipa tẽi vahe, yipindar yuvirecoira curi —ehi.

*Jesús omombehu imombosapisa rupi omano
ãgua*

³² Yuvirasose Jerusalén ve, Jesús tenonde secói güemimbohe upe. Semimbohe rumo ndoyembovĩhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tẽi reime ãgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehĩr, che pisira che mondo pahi eta rerecuar iyavei Moisés porocuaita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. ³⁴ Mara ehi-ehi tẽira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahĩr Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaherã pẽu? —ehi chupe.

³⁷ —Ore oroipota nde mborerecuã porañetesave ore mboguapira ndeyepiri eve, ñepeĩ nde mbahe

rese pocosa coti, ambuae nde mbahe rese pocoẽhisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pĩha che co mbahe-mbahe tẽi aiporara vaherã, inungar-ra que igua iro vahe aihu vaherã viña? Iyavei, ¿peicatura pĩha che ãpiramosa aipisi vaherã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaherã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoẽhisa coti. Che Ru Tũpa omoingatu güembiporavo upe nara uguapi vaherã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe. Iyavei acoi ivate catu vahe oyeecoapirasá iteanga omborerecuasa pipe yepi. ⁴³ Pe rumo ãgüe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava

rese che hañeco ãgua, iyavei amondo vaheřã che recocuer manosave ava eta repirã Caruguar povri sui senose ãgua —ehi.

Jesús ombogüera Bartimeo sesapisoẽhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehi avei, aheve peri popive mbia ndasesapiso vahe Bartimeo serer vahe, Timoteo rahir, oguapi oĩ.

⁴⁷ Osenduse, “Jesús Nazaret pendar” hesa, osapucai pĩrata:

—¡Jesús, David suindar, che paraisurecomi tẽi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisurecomi tẽi eve! —ehi pĩrataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerẽhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe.

⁵¹ Evocoyase oporandu ndasesapiso vahe upe:

—¿Mbahe vo ereipota ayapo vaheřã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapiso vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ñipiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaingarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ñgüe peye?” ehise pēu, “Ore Yar oiporu pota, ipare niha omboyeveí voiñora” peyera chupe —ehi.

⁴ Evocoyase ahe yuviraso peri rupi. Aheve guaricu ñapichimbri osepiara imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohessa rupi tupri ité omboyeveí yuvireco chupe. Evocoyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoyase oyasia pindo omondo peri rupi saperã yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe —. ¹⁰ ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

11 Ëgüe ehi Jesús oiquese Jerusalén ve. Ipare oiique tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

12 Ahere ayihive, yuvinosese Jesús tecua Betania sui, ndasiepoi oico. 13 Osepiase amombri ivira higuera so ati vahe, oso chupe ‘¿iha pĩha?’ oyapave. Ahe rumo osepia so pãve tẽi sese. Esepia, ahe ivira upe ndosupiti vitei iha ãgua. 14 Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaherã! —ehi.

Semimbohe osendu iñehe yuvireco.

Jesús omombopa ava mbahe mboepisar tũparo pipe sui

15 Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo.

16 Ndoipotai eté que ambuae mbahe seroiquepirã tũparo pipe. 17 Ipare oporombohe aipo ehi:

—Icuachiapri aracahendar pipe aipo ehi: ‘Co che rëta yeruresa rëtarã opacatu ava ivi pipendar uve nara’ ehi. Pe rumo imonda rai vahe rëta nungar tẽi pereco —ehi.

18 Pahi eta rerecuar iyavei oporombohe vahe Moisés porocuita rese osenduse, “¿Mara yahera pĩha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia,

ahe ndoyembovıhai iporombohesa rese yuvıreco.
 19 Pıtu ramomise, Jesús yuvınose güemimbohe eta reseve yuvıraso ahe tecua sui.

Ivıra higuera ndıhai vahe ipıru

20 Ahere ayihive, añihiveive yuvırasose, osepia ivıra higuera sapo suive ipırupa vahe yuvıreco.
 21 Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivıra higuera upe ereñehe rai vahecuer, opa ité ipıru —ehi.

22 Jesús evocoiyase,

—Peyeroya Tüpa rese —ehi—. 23 Supi eté aipo ahe pëu: acoi que ava ivıtrı upe: ‘Esırı ave sui, eso para guasu pıpe’ ehi vahe oyeroya tuprise ité aipo hesa rese, ěgüe ehi etera chupe. 24 Sese aipo ahe pëu: opacatu que mbahe rese peporanduse pe yeroquisa pıpe, peyeroya itera mbahe oime vaherã rese pëu, ahese peipısi itera. 25 Acoi peyerouise, yıpındar peñero rane que pe amotarëhimbar upe, ahese ěgüe ehi aveira pe Ru ıva pendar iñero pe angaipa rese pëu. 26 ěgüe ndapeyeise, pe Ru ıva pendar avei niñeroi chira pe angaipa rese pëu —ehi.

Jesús mborerecuasa

27 İpare oyevı Jerusalén ve yuvıreco. Aheve Jesús secoise judıo tıparo guasu pıpe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvıreco sese.

28 Aheve oporandu yuvıreco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo ãgua? —ehi yuvireco chupe.

²⁹⁻³⁰ Evocoiyase omboyevî chupe:

—Che avei aporandura mbahe rese pẽu: ¿Ava vo Juan ombou ava ãpiramo ãgua; Tũpa pĩha, ava tẽi tie? Pemboyevise cheu, ahese che avei amombehura pẽu ava porocuita rupi eté pĩha ayapo co mbahe vichico —ehi.

³¹ Evocoiyase oñemoñeta aipo ehi oyeupe yuvireco: “ ‘Tũpa ombou’ yahese chupe viña, ahe evocoiyase: ‘¿Mahera ru ndaperoyai?’ ehira yandeu. ³² ‘Ava tẽi remimbou’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. ³³ Evocoiyase omboyevî chupe yuvireco:

—Ndoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pẽu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

¹ Evocoiyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivî pipe, ahe oñachi tuprî sereco iyavei oyapo mbahe uva ricuer renose ãgua. Oyapo avei oivî vahe opacatu mbahe moha ãgua. Ipare oseya oivî ava oporaviqui vahe upe iporu ãgua. Ichui osẽ, oso amombri vahesa rupi. ² Oyepotase ari

uva pohosa, ahese omondo güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. ³ Ahe rumo oipisiño, inupa-nupa imboyeve tupri tēi yuvireco. ⁴ Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, ñehe mara-mara tēiño avei yuvireco chupe. ⁵ Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipāhu pendar rese yuvirocua-rocuano yuvireco, oyucaño avei ambuae yuvireco.

⁶ “Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pāve topita co ivi’ ehi yuvireco. ⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachipri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ñgua.

¹¹ Ñgüe ehi niha yande Yar yapo.

¡Mara ehi rutei revol!’ ehi icuachipri pipe” ehi.

¹² Evocoyase oviraso pota voi Jesús soquenda ñgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecóña iri tēi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuvirasó chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ēgüe ehi co mbia” nderei eté ava upe iyavei ereporombohe mbahe supi tupri vahe Tūpa remimbotar apo ãgua rese. ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pīhaēhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoyase ñepeí guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoyase pemondora Tūpa upe —ehi.

Evocoyase oyepihamondi tēi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseyá güembicuachiagüer yandeu aipo ehi: “Que cuimbahe omenda vahe omanose guahiẽhiseve, tivri evocoyase omendara sembirecocuer rese ahe viquehir omano vahecuer upe nara tahira oico.” ²⁰ Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahi eté rumo. ²¹ Ipare tivri omenda viquehir rembirecocuer rese. Ahe rumo omanoño, ndatahi avei rumo. Ëgüe ehi tupri avei tivri imombosapisa. ²² Ëgüe ehi co siete tupri omenda ahe cuña rese, ndatahi eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rembireco itera pïha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoyase Jesús omboyevi chupe:

—Pe pihanemoñeta pipe peyavi. Esepia, ndapeicuai eté Tũpa ñehe icuachiapri aracahendar, ndapeicuai avei Tũpa pĩratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tũpa rembiguai ìva pendar nungar yuvirecoira ìvave. ²⁶ Co cuerayevisa resendar rumo amombehura pëu: aviye ndapeyeroqui anga vahe Moisés rembicuachiagüer pipe, acoi caha rese sendi guasu vahe aviterve Tũpa aipo ehise chupe: ‘Che Abraham, Isaac, iyavei Jacob

Tũpa aico' ehi vahe. ²⁷ ¡Tũpa ndahei omano va-hecuer Tũpa! ¡Ahe rumo oicove vahe Tũpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepi Moisés porocuita rese oporombohe vahe osendu ñehe pĩratase oyeupe yuvireco, oicua avei Jesús omboyevi tuprise ñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuita aviye catu vahe aipo ehi: 'Pesendu Israel: yande Yar Tũpa aheño ité ñepi yande Yar secoi. ³⁰ Eresaisura nde Yar Tũpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pĩratasa pipe' ehi. ³¹ Iyavei imoñuviriosa porocuita ahe co: 'Eresaisura ambuae ava nde yeaisu nungar' ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepi Tũpa iyavei ndipoi eté ambuae. ³³ Iyavei yasaisura Tũpa opacatu yande pihá pipe, opacatu yande yapisacasa pipe, opacatu yande pĩratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri tēi sui —ehi.

³⁴ Evocoiyase Jesús icuase co ava pihañemoñeta tupriša, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaheṛā mbahe rese yuvireco chupe.

¿Ava suindar pīha Poropĩsirosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropĩsirosar David suindar ité” ehi yuvireco? ³⁶ Esepia, David ité aipo ehi Espiritu Santo pĩratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’ ehi David aracahe. ³⁷ ¿Mahera ru, “Poropĩsirosar David suindar secoira” peye, David teieté, “Che Yar” ehise chupe? —ehi.

Ava rehi oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco.

³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave uguapi yuvireco yepi no.

⁴⁰ Iyavei cuña imer mano vahecuer rēta virocuarocua tēi ichui. Oarondaguã tēi avei oyeroqui

pucu-pucu yuvireco. Ahe rumo oipisira Tūpa ñemoirosa ipĩrata catu vahe yuvireco curi” ehi.

Cuña imer mano vahecuer porerecosa

⁴¹ Ñepeí ari Jesús oguapí oĩ porerecosa rĩru rovai ava repia ãgua mara ehi oporerecosa imondo ipĩpe yuvireco. Aheve setá mbahe yar omondoño ité guarepochi yuvireco. ⁴² Ahe pĩpeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipĩpe. ⁴³ Evocoyase Jesús oñehe güemimbohe upe aipo ehi:

—Supi eté che aipo ahe pẽu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi rĩru pĩpe. ⁴⁴ Ambuae ava eta rumo oguarepochi rumbirermi tẽi omondo oporereco ãgua yuvireco; co cuña rumo oparaisusa pĩpe opa ité omondo oguarepochi —ehi güemimbohe upe.

13

“Imondurusara tũparo guasu” ehi Jesús

¹ Jesús osẽse tũparo guasu pĩpe sui, ahese ñepeí semimbohe aipo ehi chupe:

—Ore mbohesar, ¿esepia oĩ ita imopuhapri, icatupri ai! —ehi.

² Jesús rumo omboyevĩ chupe:

—¿Pesepia co oĩ tuvichá vahe ité? Ndipoi chiterera rumo que ñepeí ita oyeha vite vahe; opacatu ité imondurusara curi —ehi.

Cañi renonde mbahe oime vaherã

³ Evocoyase Jesús yuviraso ivitri Olivo ve, ahe ivitri tũparo guasu rovai tupri. Aheve Jesús

ogupise oĩ, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyeve chupe: “Peicua catu, peyembopa ucai rene ambuae ava upe. ⁶ Esepia, setá ava yugüerura, ‘Che niha Poropĩsirosar aico’ ehi tẽira ava eta mbopa yuvireco.

⁷ “Pesenduse rumo ñehesa vavasa resendar cohave, iyavei que rupi, ndapeyembosiquiyei chiterera. Esepia niha, ãgüe ehi rane itera; ndehi vitei chira rumo ari cañi. ⁸ Esepia, ñepe i vi pipendar ovavara ambuae i vi pipendar rese oyeupe yuvireco; iyavei oimera i vi riri opacatu-catu tẽi tecua rupi, tiavor avei. Co rumo omboipi ramomira mbahe tẽi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tẽi yuvireco. ãgüe peyera peñeche che recocuer rese chupe. ¹⁰ Cañi renonde rumo co ñehesa pĩsirosa resendar opacatu rane ité ava upe icua ucasara i vi rupi. ¹¹ Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuaru Tũpa pe ñeche ãgua pẽu. Esepia, ndahei chira peyesui tẽi peñeche, Espĩritu Santo ité oñehera. ¹² Ipare rumo ava omondoñora vivri yamotarẽhisar upe ‘toyuca yuvireco’ oya. ãgüe ehi aveira ava guahir upe; tahir avei oyamotarẽhiñora oyesupa yuca uca ãgua yuvireco che recocuer rese.

¹³ Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

¹⁴ “Tũparo guasu maranehi pipe pesepiase mbahe-mbahe tēi aposa —acoi oyerogui vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güeta harive secoi vahe, ahe ari toique iri eme güetave mbahe renose āgua. ¹⁶ Acoi que rupi tēi secoi vahe, toyevi eme avei güetave oyeaosa renose āgua. ¹⁷ ¡Iparaisu itera cuña ipuruha vahe ahe ari pipe, imembi pītani vahe avei! ¹⁸ Peporandu Tũpa upe, toime eme co nungar mbahe sōhisa vahe pipe pēu. ¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. ²⁰ Iyavei yande Yar nomombituhuse ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropĩsirosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. ²² Esepia, yugüerura ava, ‘Che Poropĩsirosar aico’ ehi tēi vahe, iyavei, ‘Che amombehu vahe Tũpa Ñhengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pĩratasa mboyecua āgua yuvireco. Aviyeteramo ombopa aveira ava Tũpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tũpa Rahir oyevise

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasi tata avei opara oviapi i va sui, iyavei i va resendar mbahe oririira yuvireco. ²⁶ Ahese che, Ava Riquehir, i va quiha rese ayecua itera vitu che pĩratasa pipe che rendigũer porañetesa pipe avei. ²⁷ Ipare amboura che rembiguai eta i va pendar. Ahe evocoyase omonuhara opacatu i vi rupindar che rembiporavo yuvireco, que amombri rupi yuvirecoi vahe, que i va rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cõimi ari sacu vahe yepota ãgua yandeu yepi. ²⁹ Na ehi aveira niha pẽu che ñehe rupi tupri mbahe pesepiase. Sese peicuara che, Ava Riquehir, cõimi eté che yevi ãgua. ³⁰ Supi eté yuvirecove vitera ava osepiya vahe, co mbahe opase yaviye. ³¹ Iva, i vi opara ocañi; che ñehengagũer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi ãgua yuvireco, che Ru rembiguai i va pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rãrora peye. Esepia niha, ndicuasai che yevi ãgua. ³⁴ Inungar que mbia amombri oso pota ãgua renonde, güembiguai oseyapa güeta rãro ãgua, omondo avei ñepeipei upe iporaviqui ãgua, iyavei omondo güeta roquendipi rãro ãgua. ³⁵ Pe evocoyase pemahemohara. Esepia, ndapeicuai marase che oi yar ayevira pẽu, aviyeteramo

pĩtu ramosẽ, pĩtu mbĩter, tacura ñehese, anise añihivei. ³⁶ Ndaipotai pemahemohaẽhiseve tẽi ayevira. ³⁷ Che aipo ahe pẽu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca ãgua rese yuvireco

¹ Ipare ñuvirío arĩ judío Pascua pieta ãgua ipane, ahe pieta pĩpe yuvirohu pan ndayapepoi vahe yepi, pahĩ rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco.

² Ambuae rumo aipo ehi yuvireco:

—Ndiyai pieta pĩpe ité yaipisi ava rehĩ yemondiiẽhi ãgua yandeu —ehi.

Cuña Jesús rese mbahe sãcua vahe oipiyere

³ Ahese Jesús seci Betania ve Simón lepra vireco vahecuer rõtave. Aheve mesave chini-seve, cuña güeru mbahe sãcua vahe siru reseve sepĩ iteanga vahe. Ahe osovapisa rerocua, ipare oipiyere Jesús ãca rese. ⁴ Ambuae ava aheve yuvinoi vahe rumo oñemoiro tẽi aipo ehi yuvireco oyeupe:

—¿Mahera vo co omocañi tẽi mbahe sãcua vahe?

⁵ Omondo vahe ité tie co tresciento arĩ rupindar mboraviqui repri rupi ava iparaisu vahe pĩtivii ãgua viña —ehi yuvireco.

Omañeco tẽi avei ahe cuña yuvireco.

⁶ Jesús rumo aipo ehi ahe ava upe:

—Teheni, ãgüe tehiño, ¿mahera vo pemañeco tẽi? Co mbahe oyapo vahe rumo cheu aviyẽ ité. ⁷ Ava iparaisu vahe niha yuvirecoiño itera pe pãhuve,

iyavei peyapoño itera mbahe aviye vahe peyapo potase chupe; che rumo ãgüe ndahe viteñoi chira vichico pe pãhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoëhi vitesese. ⁹ Supi eté aipo ahe pëu: ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarëhimbar upe

¹⁰ Evocoyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua. ¹¹ Senduse, oyemboviharere: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo ãgua yamotarëhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovëhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sëta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. ¹⁵ Evocoyase ahe omboyecuará oi guasu

ivatendar imoingatupri p̄u. Aheve pemoingatu mbahe yahu vaheṛã —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ P̄itu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe p̄u: ñepeí pe p̄ahu pendar yande piri ocaru vahe che mondora che amotar̄himbar upe —ehi.

¹⁹ Evocoyase semimbohe ndoyembov̄ihai t̄i yuvireco, iyavei oporandu-randu t̄i ñepeí-peí chupe yuvireco:

—¿Che p̄iha? —ehi yuvireco.

²⁰ Omboyevi rumo güemimbohe upe:

—Ñepeí eté pe p̄ahu pendar ahe co omoaqui pan che caro p̄ipe. ²¹ Supi eté che, Ava Riqueh̄ir, amboav̄iyera icuachiapri; jiparaisu catura rumo acoi mb̄ia che mondosar! Av̄iye catura ahe mb̄ia ndoyesuisse viña —ehi.

²² Yuvirocaru v̄iteseve, Jesús oip̄isi pan, “Av̄iye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peip̄isi; co che rete —ehi.

²³ Ipare oip̄isi igua r̄iru, “Av̄iye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴ Ahese aipo ehi:

—Co che ruvi, ahe che Ru remimbotar ip̄iasu vahe p̄u nara. Oyepiyerera ava reh̄i recocuer rese nara. ²⁵ Supi eté aipo ahe p̄u: ndaihu iri

chietera uva ricuer cheu arı oyepotase voi che Ru Tũpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuvıraso ivıtrı Olivo ve.

²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiaprı pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvıreco’ ehi. ²⁸ Che cuerayevire rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvıreco, che rumo ẽgũe ndahei chietera —ehi.

³⁰ Aipo ehi rumo Pedro upe:

—Che rumo supı eté aipo ahe ndeu: co pıtu pıpeve voi eté tacura ñehe yupagũe renondeve, “Ndaicuai vahe evocoi mbia” erera mbosapı oyupagũer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi—ehi catuño ité chupe.

Ambuae opacatu aipo ehi tuprı tẽi avei yuvıreco chupe.

Jesús oyeroqui Getsemanı ve

³² Ipare yuvıraso Getsemanı ve yuvıreco. Aheve Jesús aipo ehi gũemimbohe upe:

—Peguapı cohawe, che aso ranera ayeroqui peve —ehi.

³³ Aheve vîraso Pedro, Santiago, Juan oyeupi. Ahese ndoyepîhambovîhai eté oico ³⁴ aipo ehi:

—Che cûritei ndavîhai eté. Esepia, che hã oyandu ité manosa. Pepîta rane cohave, iyavei pemahemohara pe yeroqui pipe —ehi güemimbohe vîraso vahe upe.

³⁵ Evocoyase oso tenonde catumi. Aheve oyaivî ivî rese oso, oporandu Tûpa upe mbahe tasi vahe reimeêhi âgua oyeupe. ³⁶ Oyeroqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe têi sui eve; tayapo eme che remimbotar têi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuvîroque yuvîrocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeî hora nde ropesî upe? ³⁸ Pemahemoha, peyeroqui mbahe têi pipe pe viapiêhi âgua. Pe niha pequerêhi ité viña, pe retecuer têi rumo nîpiratai pêu —ehi.

³⁹ Ichui oso iri oyeroqui, aipo ehi tupri avei oñehe. ⁴⁰ Ipare oyevisê, osesapiha iri ique-seve têi avei. Esepia, sopesî nomboyeroyai eté yuvîreco, ahese ndoicatui eté iñehe mboyevi yuvîreco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupitî ité che, Ava Riquehir, mondo âgua ava yangaipa vahe povrive. ⁴² Pepûha, yaso. Esepia, cõimi eté che amotarêhisar upe che mondo vaherã secoi —ehi.

Jesús ipîsîsa

⁴³ Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Pormbohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovínose oquise pucu. Ipipe oyasia pahi rerecuar ivate catu vahe rembiguai nambi. ⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco. ⁵¹ Mbia chíhivahe rumo turucuar pipe güerañomi oñemama vahe supive secoi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. ⁵⁴ Pedro avei

amombri rupive tēi oique ité oso pahi rerecuar ivate catu vahe rēta āchisa pipe. Aheve oguapiño mbia sundao pāhuve tata ipive oyephe oī.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaherā Jesús rese yamotarēhisave yuca uca āgua yuvireco; ndoicatu eté rumo yuvireco. ⁵⁶ Iyavei setá iteanga tēi semira yuvireco sese; oyecopi-copi tēi rumo güemira pipe. ⁵⁷ Amove aipo ehi tēi yuvireco seco momara āgua:

⁵⁸ —Ore orosendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi ari rupi opara amopuha. Ndahe iri chira evocoyase ava tēi rembiapo’ ehi —ehi tēi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opūha oporandu Jesús upe:

—¿Nderemboyevii chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tūpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayevisavei i va quiha rese curi —ehi chupe.

⁶³ Evocoyase pahi rerecuar ivate catu vahe omondo oturucuar aipo ehi:

—¿Mbahe iri vo yande yaipota v̄ite yaico?
 64 Yasendupa niha aipo Tūpa upe iñehe-ñehe t̄eisa,
 ¿mara ehi aipo evocoyase pe p̄ihave? —ehi.

Ipare opacatu guasu ava, “¡Tomanof̄no it̄e!” ehi
 yuv̄ireco chupe.

65 Ahese amove ava ondiv̄i-ndiv̄i sese iyavei
 osesacua, ipare yuv̄irocua-rocua sese aipo ehi
 yuv̄ireco:

—¡Eicua it̄e ru, ava evocoi ocua nde rese! —ehi-
 ehi yuv̄ireco chupe.

Sundao tūparo r̄ārosar avei osovapete-pete
 yuv̄ireco.

*Pedro, “Ndaicuai vahe evocoi mb̄ia” ehi Jesús
 upe*

66 Pedro iv̄ive ñachimbr̄i p̄ipe secoi. Aheve cuña
 oyepota ou pah̄i mborerrecuar iv̄ate catu vahe
 rembiguai chupe. 67 Osepiase Pedro iyepehese
 tata iv̄ive, omahengatu oh̄a sese aipo ehi chupe:

—Nde avei acoi Jesús Nazaret pendar rupindar
 ereico —ehi.

68 Ahe rumo aipo ehiño:

—Ndaicuai vahe it̄e rumo aipo mb̄ia; ndaicuai
 avei aipo nde ñehesa —ehiño chupe.

Ichui os̄ese oquend̄iv̄ive oh̄a, ahese oñehe
 tacura. 69 Omahe irise co cuña mbiguai sese,
 ahe aipo ehi ahe pendar ava yuv̄irecoi vahe upe:

—Co ava niha supindar it̄e —ehi.

70 Pedro rumo, “Ndahēi et̄e che” ehiño. Iparemi
 t̄ēi ambuae ava aheve yuv̄irecoi vahe aipo ehi iri
 yuv̄ireco chupe:

—Nde it̄e niha supindar ereico. Esepia, nde
 Galilea iguar it̄e ereico —ehi chupe.

71 Pedro evocoyase,

—¿Tũpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapí oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuaíta rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tẽi mbahe sembiaviẽhi yuvireco chupe. ⁴ Evocoiyase Pilato oporandu iri chupe aipo ehi:

—¿Mahera vo ndereñehi eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoiyase, “¿Mara ehi rutei pĩha?” ehi tẽi.

“¿Tayaticasa!” ehi ava Jesús upe yuvireco

⁶ Mborererecuar guasu recosa ité ñepei ava soquendapri renose água Pascua pieta pipe ava rehi porandusa rupi yepi. ⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve. ⁸ Ava yugüeru Pilato upe

‘tayaposa pieta pīpe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vaheṛã judío rerecuar? —ehi.

¹⁰ Esepia, Pilato oicuaño ité ava rese yemoecatêhisa pīpe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosê’ ombohe ati-ati uca ava yuvireco. ¹² Evocoiyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevĩ Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoiyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pīpe, imondo curusu rese yatica ãgua.

¹⁶ Ahese sundao viraso mborerecuar rēta sui ambuae oi pīpe, aheve opacatu omboetasa omonuha yuvireco. ¹⁷ Aheve omboyemonde turucuar pĩraumbĩ vahe pīpe yuvireco, ipare yu pīapri omunde ñaca rese. ¹⁸ Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pīpe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu.

²⁰ Mara-mara tēi sereco pare, ovirocua iturucuar

pĩraumbi vahe yuvireco ichui, ahese omonde iturucuar ité yuvireco sese. Ichui vīnose ocarve yatica ãgua yuvireco.

Jesús yaticasa curusu rese

²¹ Ñepeĩ mbĩa Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Ério, terevosĩ curusu co Jesús vireco vahe rese” ehi voiño tēi yuvireco chupe.

²² Jesús oviraso Gólgota serer vahesave yuvireco (‘Ava Ñca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. ²⁴ Evocoiyase oyatica yuvireco. Ipare sundao iguayĩño Jesús turucuar rese ‘¿uma pĩha vīrasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ. ²⁷ Supive avei yaticasa ñuvirío imonda rai vahe ñepeĩ mbahe rese ipocosa coti, ambuae mbahe rese ipocoēhisa coti. ²⁸ Ēgüe ehi imboavīye icuachiapri aipo ehi vahe: “Ava mbahe-mbahe tēi aposar nungar ipãhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ëgüe ehi avei pahi eta rerecuar, oporombohe vahe avei Moisés porocuita rese ñehe mara-mara tēi yuvireco chupe, aipo ehi yuvireco oyeupe:

—Oipĩsiro ambuae. Ahe ae rumo ndoicatu oñepisiro. ³² ¡Poropĩsirosar Israel rerecuar guasu, toyeeroyi ahe ae curusu sui cūrītei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri pĩtu ivi rupi. Ëgüe ehi las tres rupi. ³⁴ Ahese tupri avei Jesús oñehe pĩrata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse ñehe, aipo ehi yuvireco:

—Pesendu aipo Tũpa ñehe mombehusar Elías upe oñehe —ehi yuvireco chupe.

³⁶ Evocoiyase ñepe imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toi hu’ oya:

—Ëgüe tehiño rane, ¿oura pĩha Elías seroyi ãgua curusu sui? —ehi.

³⁷ Ahese Jesús sãse pĩrata. Ipare omano.

³⁸ Aheseve tũparo asiãsa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tũpa Rahir ité —ehi.

⁴⁰ Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chihivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipitivii vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pĩtu ramosé, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Tũpa mborerecuasa osãro vahe oico, oquerẽhisa pipe ité oique oso Pilato upe oporandu ãgua Jesús rehõgüer rese. ⁴⁴ Pilato rumo oyepihamondi tẽi, “Omano” hese. Oñehe sundao rerecuar upe oporandu ãgua ‘¿marase vo ãgüe ehi?’ ⁴⁵ Sundao rerecuar omombehuse chupe, ahese omondo sehõgüer José upe. ⁴⁶ Evocoyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiaño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocua mbahe sãcua vahe Jesús rehõgüer rese nara yuvireco.

² Iyavei añihiveive, yipindar ari semana pipe, oyepota Jesús ruvipave icatu ramosé yuviraso.

³ Aheve aipo ehi oyeupe yuvireco:

—¿Ava p̄ha co tehõgüer rovap̄isa v̄irocuara yuv̄ireco yandeu? —ehi.

⁴ Osep̄iase rumo ita guasu yuv̄ireco, ndahe irise güendave ih̄ai, ⁵ yuv̄iroiquese tehõgüer ruv̄ipave yuv̄ireco, aheve osep̄ia ombahe rese pocosa coti mb̄ia ch̄ihivahe, iturucuar pucu morochi vahe oguap̄ise oĩ. Aheve cuña oyembosiquiye yuv̄ireco. ⁶ Ahe rumo aipo ehi chupe:

—Pes̄iquiye eme. Pe peseca Jesús Nazaret pendar, yaticap̄ri. Ahe rumo ocuerayevi; ndipoi eté cohave. Pesep̄ia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesep̄iara mbahe che remimombehu rupi tup̄ri’ peyera —ehi.

⁸ Evocoyase ahe cuña yuv̄inosese tuv̄ipa sui, yuv̄inoña yuv̄iraso, or̄iri avei osiquiyepave. Iyavei nomombehui eté ambuae ava upe osiquiyepave yuv̄ireco.

Jesús oyemboyecua María Magdalena upe

⁹ Jesús ocuerayev̄ire añihiveive domingu pipe, oyemboyecua yip̄indar María Magdalena upe, ahe ichui acoi siete tup̄ri caruguar opa omboyep̄epi. ¹⁰ Ahe oso imombehu supindar upe. Ahe rumo oyaseho v̄ite ov̄ihar̄eh̄isave yuv̄ireco. ¹¹ Osenduse cuña ñehe: “Jesús ocuerayevi, che ité asepiã” ehise, ndov̄iroyai eté yuv̄ireco.

Jesús oyemboyecua ñuv̄irío güemimbohe upe

¹² Ip̄are Jesús oyemboyecua iri ñuv̄irío güemimbohe upe ambuae güep̄iaca pipe per̄i rupi. ¹³ Ahe avei yuv̄iraso omboetasa upe imombehu; ndov̄iroya v̄iteiño avei rumo yuv̄ireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa p̃sirosa resendar peico. ¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirã tēi yuvirecoira. ¹⁷ Co mbahe poromondiisa omboyecudara che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oĩ. ²⁰ Semimbohe evocoyase opa yuviraso opacatu ivi rupi ñehesa p̃sirosa resendar mombehu. Yande Yar avei oipitivi, iyavei mbahe poromondiisa pipe omboyecua uca ité ñehesa p̃sirosa resendar supi eté vahe. Aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739